

# მესტიის რაიონის სოფელ ხაიშის მოსახლეობის მიმართვა

**საქართველოს კათოლიკოს-პატრიარქს, ილია მეორეს  
და პრემიერ-მინისტრს, ზიძინა ივანიშვილს**

თქვენ კარგად იცნობთ სვანეთს, მის ისტორიას, ენას, ეთნოგრაფიასა და ხუროთმოძღვრებას, პოლიფონიასა და ქორეოგრაფიას, სვანურ სამართალსა და სხვა უნიკალურ დამახასიათებელ ნიშნებს, რაც სვანეთს საქართველოს სხვა კუთხეებისაგან განასხვავებს, მაგრამ ამავე დროს ამდიდრებს და ავსებს ზოგად ქართულ კულტურას. ყოველივე ეს დღეს საფრთხის წინაშე დგას.

მოგესხნებათ, კვლავაც გრძელდება ხუდონჰესის მშენებლობის განახლების მცდელობა, რომელიც თითქმის 40 წელია ერთგვარ დამოკლეს მახვილივით კიდია ზემო სვანეთის თავზე. აღნიშნული ჰესის მშენებლობა, რომელიც 1986 წელს დაიწყო, 1989 წელს შეჩერდა სულმნათი მერაბ კოსტავას, ზვიად გამსახურდიას, ზურაბ ჟვანიასა და სხვა ღირსეულ მამულიშვილთა თაოსნობით, როგორც ყოვლად გაუმართლებელი და დამაქცევარი ჩვენი ქვეყნისა.

ჩვენ გარშემო მრავლადაა დიადი საბჭოეთის მიერ განხორციელებული, ყოვლად გაუაზრებელი გრანდიოზული პროექტები, რომელთაც ხალხს დაპირებული სიკეთის ნაცვლად მხოლოდ ბოროტება და ნგრევა მოუტანა. სამწუხაროდ, ამავე კატეგორიას მიეკუთვნება ხუდონჰესიც, რომელიც არამხოლოდ ხაიშის თემს ალგვის პირისაგან მიწისა, არამედ ეჭვქვეშ აყენებს ზემო სვანეთის მომავალსაც.

წინა ხელისუფლებამ 2010 წელს ისე გააფორმა მემორანდუმი ხუდონჰესის ინვესტორ კომპანია „ტრანსელექტრიკა ჯიოჯიასთან“, რომ მოსახლეობის აზრი არ გაითვალისწინა. ჩვენ მხოლოდ საბოლოო გადაწყვეტილება გაგვაცნეს. სამწუხაროდ, იგივე მდგომარეობაა დღესაც. არ ჩატარებულა ფართომასშტაბიანი შესვედრა რაიონის მოსახლეობასთან. ხაიშელების აზრი კი საერთოდ იგნორირებულია.

„ქართული ოცნების“ წინასაარჩევნო პროგრამაში სამართლიანადაა მითითებული წინა ხელისუფლების შეცდომა. კერძოდ ის, რომ მოსახლეობა დაშორებული იყო ხელისუფლებას. აქვე ეწერა, რომ უნდა აიკრძალოს დიდი ჰესები და ატომური ელექტროსადგურები.

ხუდონის აშენების შემთხვევაში იძულებით უნდა გაასახლონ 1200 ადამიანი, რაც მესტიის რაიონის მოსახლეობის 10 პროცენტზე მეტია. აღსანიშნავია, რომ უკანასკნელი 25-30 წლის განმავლობაში ზემო სვანეთის მოსახლეობამ 25000-დან 12000-მდე იკლო. რელოკაციას უნდა დაექვემდებაროს 850-ზე მეტი სასაფლაო და რაც ყველაზე საფაღალო და სამწუხაროა, წყლით დაიფარება ხაიშის წმინდა გიორგის სახელობის მოქმედი ტაძარი.

ბატონო პრემიერო და თქვენო უწმიდესობავ, მოგმართავთ თხოვნით ხაიშისა და ზემო სვანეთის დანარჩენი 16 თემის მოსახლეობა, ნუ გადაწყვეტთ სვანეთის მომავალს ასე ხელაღებით!

**აღნიშნული მოსახლეობის სახელით გოჩა თორია და  
ზური ნიჟარაზე**